



PROJEKAT SYSTEM: Podrška uspostavljanju i unapređenju mehanizama za podršku samozapošljavanju kroz saradnju inovativnih lokalnih zajednica i novih preduzeća u prekograničnom području“

Općina Novo Sarajevo organizovala je jednodnevnu **edukaciju** na temu "**Kako razviti inovativan proizvod i uslugu**" u okviru projekta SYSTEM koja se održala u utorak, 22.11.2022. godine u svečanoj sali JU Međunarodni centar za djecu i omladinu Novo Sarajevo.

Na događaj je pozvano 67 učesnika na projektu SYSTEM sa područja Kantona Sarajevo koji su na bazi prijave, odabrani za sudjelovanje u Programu podrške samozapošljavanju po javnom pozivu. Događaj je okupio njih 16 kao i predstavnike institucija koje sprovode projekat.

Programom edukacije predviđeno je predavanje na temu inovacija, predstavljanje iskustava i primjera dobre prakse, a otvoreno je uvodnim obraćanjem Azre Prašović, koordinatorice na projektu ispred Općine Novo Sarajevo, koja je izjavila da se učesnicima na projektu nudi prilika za usavršiti startup ideju te da se žele ohrabriti postojeći i budući preduzetnici/preduzetnice za nove poduhvate kako bi bili spremniji za buduće profesionalne izazove u startup svijetu ili drugdje.

Specijalističku edukaciju izvodila je trenerica Adela Ramić, konsultantica za finansije i poduzetništvo, ispred DAORSINA d.o.o. Mostar, koja je izjavila: „Edukacija se tiče nekih od najaktuelnijih tema današnjice, a to su kreativnost i inovativnost. Sticanje novog znanja i inovativno razmišljanje su neophodni za svakodnevno funkcionisanje i rad danas. Kreativnost i inovativnost danas nisu nešto na što se gleda kao iznimne osobine. Kreativnost i inovativnost se danas traže u svakodnevnom poslu velikih kompanija, a posebno su bitni u malim startup biznisima. Često su upravo kreativnost i inovativnost ono što će jedan startup biznis održati i učiniti ga jednim od 20% biznisa koji će preživjeti kritičnu prvu godinu poslovanja.

Nije pitanje da li možemo biti inovativni, pitanje je kako da budemo inovativni, jer moramo. Cilj naše edukacije jeste da se poduzetnici i poduzetnice motivišu i inspirišu na kreativno i inovativno razmišljanje. Oni bi trebali inovativan način razmišljanja zadržati trajno prilikom donošenja poslovnih odluka. Zato bi edukacije na ovu temu trebalo da se ponavljaju i nadograđuju, sa naglaskom na prostor za diskusiju i povratnu informaciju. Preduslov za inovativnost u biznisu su znanje i validne informacije sa tržišta. Da bi mladi poduzetnici i poduzetnice bili inovativni, moraju imati mnogo drugih znanja koja nisu uvijek direktno vezana za proizvod ili uslugu koju nude, nego često za finansije i stanje na tržištu. Edukacija o inovativnosti je usko povezana sa drugim edukacijama koje su neophodne startup biznisima.“

Jedna od učesnica na projektu SYSTEM, Nejra Lončarević istakla je u razgovoru da je cjelokupni projekat izuzetno koristan, a edukacija je omogućila da se kao učesnici upoznamo i uz pomoć trenerice ohrabrimo u stvaranju naših malih, ali isto tako i korisnih biznisa. Dobili smo korisne savjete uz pomoć kojih se sigurno možemo kretati samo uzlaznom putanjom.

Općina Novo Sarajevo zajedno sa projektnim partnerima Općinom Ilijaš i Krovnom organizacijom mladih Srbije **organizovat će i online edukaciju (webinar) 26. decembra 2022. godine** na temu "**Kako razviti inovativan proizvod i uslugu**" za polaznike preduzetničke akademije iz Srbije (Grad Sremska Mitrovica i Grad Loznica) i BiH (Kanton Sarajevo) koji su na bazi prijave, odabrani za sudjelovanje u Programu podrške samozapošljavanju po javnom pozivu.





Edukacija se organizuje u okviru projekta SYSTEM koji implementira Općina Novo Sarajevo sa projektnim partnerima Općinom Ilijaš i Krovnom organizacijom mladih Srbije, sufinansiranog bespovratnim sredstvima Europske unije u okviru finansijskog instrumenta prepristupne pomoći IPA II kroz Program prekogranične saradnje Srbija-Bosna i Hercegovina 2014-2020.